



Saopštenje za javnost

Otkriven djelić tajni rijeke Drine u jezeru Perućac

Preliminarno identificirane 162 osobe

Sredinom ovog mjeseca počinje obdukcija **nekompletnih** posmrtnih ostataka žrtava koje su u ljeto 2010. godine pronađene tokom asanacije jezera Perućac.

Do ovog časa utvrđen je **preliminarni identitet** 162 osobe, a na temelju izoliranih jedinstvenih DNK profila osnovano se može pretpostaviti da je broj pronađenih žrtava veći od 200.

Žene

Među pronađenim žrtvama **40** (oko 25 %) su osobe **ženskog pola**, uključujući tri djevojčice uzrasta od 9,5 do 17,5 godina. Ukupan procenat nestalih osoba ženskog pola na nivou Bosne i Hercegovine je oko 13 %, što znači da je broj pronađenih u jezeru Perućac dvostruko veći od procenta na nivou Bosne i Hercegovine.

Imamagić Aiša i Ohranović Hašida rođene 1906. godine su ujedno i najstarije pronađene žrtve jezera Perućac.

Djeca

Ukupan broj pronađene djece je **10** (oko 6%), što je takođe dvostruko više od procenta nestalih maloljetnih osoba na nivou cijele zemlje.

Među pronađenom djecom je i **troipogodišnji Podžić Haris**, rođen 1988. godine koji je ujedno i najmlađa otkrivena žrtva jezera Perućac.

Stare osobe

Preliminarnom identifikacijom je utvrđeno da je **36** osoba (oko 22%) bilo **starije od 60** godina u vrijeme njihovog nestanka, a među njima je 18 žrtava ženskog i 18 žrtava muškog pola.

Srebrenica i Žepa

Od ukupno 162 osobe njih **24** (oko 15%) su nestali na području **Srebrenice i Žepe** u julu i avgustu 1995 godine, a preostalih 138 žrtava nestali su tokom 1992. (135 osoba) i 1993. godine (3 osobe). Na području općina Višegrad, Foča, Rudo, Goražde, Rogatica, Priboj i Prijepolje (Republika Srbija), Kovin (Vojvodina) i Priština (Kosovo).

Regruti bivše JNA

U jezeru Perućac pronađena su i dva **regruta bivše JNA** koji su u toku 1991. godine upućeni na služenje vojnog roka u Kovina i Prištinu – **Ahmetspahić Almas**, rođen 17.11.1972. godine iz Višegrada i **Meštrovac Ermin** rođen 15.02.1973. iz Jajca.

Štrpci – otmica iz voza „Lovćen“ 671

Dva od 19 putnika voza koji je saobraćao na relaciji Beograd – Bar, koji su oteți na željezničkoj stanici u **mjestu Štrpci** 27.02.1993. godine pronađeni su u jezeru Perućac. Radi se o državljanima Republike Srbije – **Čorić Rasimu** i Republike Crne Gore – **Rastoder Jusufu**.

Ranije su takođe u jezeru Perućac pronađeni nekompletni ostaci i trećeg putnika Zupčević Halila, dok posmrtni ostaci preostalih 16 putnika još uvijek nisu pronađeni.

Sjeverin – otmica iz autobusa

Posmrtni ostaci **Hodžić Medredina**, jednog od 16 oteatih putnika 22.10.1992. godine iz **autobusa u mjestu Sjeverin**, općina Priboj (Republika Srbija) su takođe pronađeni u Jezeru Perućac.

Nacionalna pripadnost

Od 162 preliminarno identificirane žrtve 160 su bošnjačke i 2 srpske nacionalnosti.

Reasocijacija ranije ekshumiranih žrtava

Dijelovi posmrtnih ostataka **25 žrtava** od 162 do sada preliminarno identificiranih žrtava su **ekshumirani tokom ranijih asanacija jezera Perućac** na lokalitetima sela Kurtalići (2000. godine), Kameničko točilo (2000. godine) i Barimo (2005. godine).

Lokacije

Žrtve su pronađene na više od **60 mikrolokacija** u 30 sela i zaselaka na području općina **Višegrad, Rogatica, Srebrenica i Bajina Bašta** (Republika Srbija).

Rezervni koštani uzorci

Laboratorija za DNK analizu u Tuzli još uvijek radi na izolaciji DNK profila iz više od 100 uzetih rezervnih koštanih uzoraka, što će sigurno rezultirati kompletiranjem već identificiranih ili utvrđivanjem novih identiteta žrtava.

Identifikacija

O terminu konačne identifikacije preliminarno identificiranih žrtava porodice će biti obavještene nakon što se okonča proces obdukcije i DNK analiza.

Zahvalnica

Institut koristi priliku da se još jedanput zahvali svim volonterima, institucijama i privrednim subjektima bez čije nesebične pomoći pri asanaciji jezera Perućac bi postignuti rezultati bili znatno skromniji.

Dodatne informacije

Za sve dodatne informacije članovi porodica i zainteresirani se mogu obratiti članu Kolegija direktora gosp. Mašović Amoru putem mobilnog telefona 061-143-144 ili putem telefona 033/715-910.

Sarajevo, 09.02.2012.

Stručni saradnik za odnose sa javnošću
Čengić Lejla

PS: mole se elektronski i printani mediji da objave integralni tekst saopćenja zajedno sa priloženim spiskovima

Prilog:

- Tabela svih nestalih
- Tabela osoba starijih od 60
- Tabela djece
- Tabela osoba ženskog pola
- Tabela nestalih 1995. godine